

117

I
F A C T V M,

Pour Maistres Iacques Iullien, Urbain Garnier,
& Hierosme Parent, Docteurs en Theologie,
del' Vniuersité de Paris, de la Societé & mai-
son de Sorbonne, deffendeurs en reglement
de Iuge, & les Recteur, Doyens, Procureurs
& Supposts de ladite Vniuersité, interuenans.

12 Contre Maistre Gabriel Saulieu, jadis Prieur dudit
College, & consorts demandeurs en requeste du
27. Nouembre mil six cents treize.

12

LE College de Sorbonne a esté fondé par le
Roy sainct Louys, de l'aduis & conseil de
Maistre Robert de Sorbonne son Confes-
seur & Ausmonier, lequel aussi à l'imitation
de ce sainct Roy a contribué la plus grande
part de ses biens pour la fondation dudit College, au-
quel il a mis l'ordre & la discipline que l'on y voit, & a
estably les Statuts & Coustumes saintes & louables,
qui depuis y ont esté obseruees: pour ces raisons ledict
College à tousiours porté & retenu jusques à present le
nom de Sorbonne.

La fin de ceste fondation & institution a esté pour
retirer & recepuoir les Professeurs és Arts, ou Regents
en Philosophie de l'Vniuersité de Paris, notamment
les pauvres de quelque nation qu'ils soient, lors qu'a-
pres leurs regences ils voudront estudier & se mettre au
cours de Theologie, comme il appert, tant par les let-
tres dudit Roy sainct Louys, que par les Bulles des
Papes qui de ce temps là ont vescu; sçauoir Alexandre
IV. Urbain IV. & Clement IV. lesquels recomman-
dent ceste institution comme tres-vtile à l'Eglise, &
extremément necessaire pour perfectionner l'estude de
Theologie, & y rendre les hommes consommez.

Le mesme se verifie par les autres tiltres dudit Colle-

ge de Sorbonne, & principalement par le statut particulier, compulsé par les deffendeurs, avec les lettres & Bulles cy dessus mentionnees, pour les produire lors que (ceste instance de reglement de Juge vuidee) il s'agira du fond de la cause, lequel statut porte en termes expres que nul ne peut estre receu à la Société dudit College, qui n'ait enseigné entierement le cours de Philosophie à Paris, autrement est déclaré incapable de ladicte Société.

Et bien que depuis vne vingtaine d'annees quelques vns n'ayent satisfait entierement audit Statut, neantmoins l'intention de ladicte Société a esté tousiours de les y obliger, comme il se voit par les conclusions de ce faiçtes, & par les renouations frequentes dudit Statut; mais depuis dix ans, comme l'on auroit receu en ladite Société quelques Euesques, Abbez & autres, sans qu'il eussent regenté, & que cela s'en alloit en telle consequence, que ledit Statut demeueroit illusoire, & du tout inutile, afin d'empescher ce desordre, il a esté renouellé & mis en sa premiere vigueur, à la requisition de Maistre Jacques Iullien l'un desdits deffendeurs en la congregation tenuë le 24. Mars mil six cents dix.

La mesme annee, la vigile de l'Assumption de nostre Dame, fessant presenté Maistre Henry Boyuin, Bachelier en Theologie, pour estre receu en ladite maison & College de Sorbonne, il fut conclud en la Congregation tenuë ledit iour, qu'il seroit aduerty dudit Statut, & au cas qu'il n'y satisfit, promettroit ne point demander d'estre receu en la Société dudit College, ains se contenteroit du seul droit d'Hospitalité, la commission de l'aduertir donnee à Maistre Hierosme Parent l'un des deffendeurs, dont il fust acquitté, & a tiré promesse verbale dudit Boyuin, suiuant l'intention de ceux de ladite société, & à la Congregation suiuate tenuë la vigile de la feste de Toussainçs, en a faiçt son rapport, qui fut approuué de tous, & avec ceste condition fut accordé audit Boyuin le droit d'Hospitalité en ladite maison de Sorbonne.

Trois ans apres ledit Boyuin, au lieu d'un cours de Philosophie de deux ans, ayant fait quelques leçons extraordinaires l'espace de quelques mois, contre le reglement & discipline de l'Vniuersité de Paris, sans adueu de Monsieur le Recteur, & au preiudice des Regens ordinaires, à supplié pour estre receu en ladite Société, à la sollicitation & persuasion de quelques vns des Docteurs demandeurs: ainsi que luy mesme à reconnu, & par leurs brigues y a esté receu le dernier Octobre mil six cents treize, contre ledit Statut, la renouation d'iceluy, la conclusion particuliere qui l'obligeoit nommément à y satisfaire, & contre sa promesse & parole, à quoy les deffendeurs se sont opposez, protestans de nullité de ladite reception.

Les demandeurs sans auoir esgard à ceste opposition & au preiudice d'icelle, le cinquiesme Novembre audit an, ont présenté à Monsieur le Cardinal de Gondy Prouiseur de la maison de Sorbonne, ledit Boyuin pour luy faire donner lettres de ladite Société, lesquelles ledit sieur Cardinal luy a fait expedier.

Les deffendeurs voyans que par ceste reception pleine de nullitez, & par ces lettres de Société moyennées par les demandeurs audit Boyuin l'on contreuenoit aux ordonnance des Roys, à la reformation derniere de l'Vniuersité de Paris, & aux arrests de la Cour de Parlement, qui requierent que les Statuts de tous Colleges soient exactement gardez, & que personne n'y soit receu s'il n'est de la qualité portee par lesdites Statuts, ont présenté requeste au Preuost de Paris leur conseruateur, pour reprimer cet abus qui autrement demeureroit sans remede, & s'en iroit croissant avec d'autres, à la ruine totale de ladite maison de Sorbonne.

Ledit cinquiesme Novembre audit an, lesdits deffendeurs, en vertu de ladite requeste ont fait assigner ledit Boyuin & lesdits demandeurs pardeuant ledit Preuost de Paris, pour y voir dire & declarer nulle la reception dudit Boyuin, & cependant deffences faites de la part du Lieutenant Ciuil aux demandeurs de rece-

puoit ledit Boyuin au serment qu'ont accoustumé prester ceux qui entrent en ladite Societé, & de le mettre en possession & jouissance d'icelle.

Maistre Henry Boyuin ne recognoissant le Preuost de Paris pour Iuge, tant de luy que des deffendeurs, les fait appeller le 7. Nouembre 1613. par deuant le sieur Cardinal de Gondy Prouiseur du College de Sorbonne, comme estant seul & competent Iuge en ce fait.

Les deffendeurs au contraire scachans que ledit sieur Cardinal, comme Prouiseur n'auoit aucune jurisdiction, obtiennent sentence par deffault du Preuost de Paris, le 8. Nouembre audit an, par laquelle l'assignation à eux donnee par deuant ledit sieur Cardinal est reuoquee & annulee, les deffences de recepuoir ledit Boyuin au serment reiterees; & enioint à luy & aux demandeurs de ne se pourueoir ailleurs, & venir proceder & deffendre deuant ledit Preuost de Paris, leur seul & competent Iuge en premiere instance.

Les Recteur, Doyens, Procureurs & Supposts de l'Vniuersité de Paris, auxquels est commandé par les ordonnances des Roys, & reformation derniere de ladite Vniuersité, & par les Arrests de la Cour de Parlement, de visiter tous les Colleges, & y faire obseruer exactement les Statuts, estans aduertis de ce procès, & des procedures susdites, sont interuenus pour le deu de leur charge, avec les deffendeurs, par deuant ledit Preuost de Paris, & ont remonstré que par l'observation du Statut dudit College de Sorbonne, il y auoit tousiours eu en l'Vniuersité grand nombre de bons Philosophes, dont tous les Colleges ont esté fournis, & le sont encore, bien qu'il n'y ait maintenant en la pluspart, ny gaiges, ny nombre suffisant d'escoliers; pour ce ont requis que la reception dudit Boyuin contraire audit Statut, & qui porteroit consequence à vne infinité d'autres, fut declaree nulle, & avec les deffendeurs ont poursuiuy le deffault contre ledit Boyuin, & les demandeurs.

Les demandeurs, comme ledit deffault estoit prest à

Juger, presentent requeste au Conseil, ou ils taisent l'interuention de l'Vniuersité deuant ledit Preuost de Paris, & sur jcelle par surprise obtiennent lettres du 29. No- uembre 1613. parties non ouyes, font appeller les def- fendeurs au Conseil pour estre reglez de Iuge, & estre renuoyez deuant le sieur Cardinal de Gondy, seul Iuge en ce faict, comme Prouiseur de Sorbonne.

Les Recteur, Doyens, Procureurs & Supposts de l'Vniuersité de Paris, comme ils sceurent que l'on auoit tiré les deffendeurs au priué Conseil, en reglement de Iuge, interuiennent derechef audit Conseil, le 15. De- cembre 1613. demandent le renuoy de ladite cause par- deuant le Preuost de Paris.

Pour leurs moyens d'interuention alleguent premie- rement les Edicts & Ordonnances des Roys, Philip- pes 6. du dernier Decembre 1340. & du 22. May 1345. Charles VIII. du mois de Mars 1488. Louys XII. du 12. May 1499. François premier, du 12. Decembre 1543. inserees au corps des Ordonnances, les Lettres de con- firmation des Priuileges de l'Vniuersité octroyees par le feu Roy Henry le Grand, veriffiees au Parlement de Paris, le 17. Aoust audit an; & celles du Roy Louys XIII. à present regnant, du mois de Decembre 1610. veriffiees au Parlement, le 9. Aoust 1611. par lesquelles Ordonnances & Lettres de confirmation, le Preuost de Paris est donné pour juge en premiere instance à tous les Supposts de ladite Vniuersité, en toutes leurs causes, sans qu'ils soient tenus comparoir pardeuant autres juges quelconques, pour les soulager de frais & les destourner moins de leurs estudes & fonctions.

Secondement disent que la maison de Sorbonne, n'y aucune autre n'a jamais esté exceptee dudit priuilege, & n'en peuuent monstrier aucun tiltre les demandeurs, non plus que de la pretenduë jurisdiction dudit Prouiseur de Sorbonne; ains que renoncans tres mal à propos à leur Priuilege, veulent comme en procurer la perte à tous ceux de ladite Vniuersité.

En troisieme lieu, sil estoit attribué quelque jurisdic-

tion au Prouiseur de Sorbonne sur ceux dudit Collège, les autres Prouiseurs, grands Maistres & Superieurs qui luy sont esgaux pretendroient la mesme sur ceux aussi de leurs Colleges, & par ainsi la jurisdiction donnee au Preuost de Paris sur les Supposits de l'Vniuersité seroit du tout inutile.

En quatriesme lieu, si la cause des deffendeurs n'est renuoyee au Preuost de Paris, comme à son premier & ordinaire juge, conformément aux ordonnances, Les Supposits de l'Vniuersité seront tirez tous les jours au priué Conseil en reglement de juge, l'un se pouruoyant pardeuant le Preuost de Paris, l'autre pardeuant son Prouiseur, grand Maistre ou Superieur, & par ce moyen lesdits Supposits tomberoient en tous les inconueniens desquels il a pleu aux Roys par leurs priuileges les preseruer.

Les deffendeurs pour prouuer aussi par les tiltres dudit Collège de Sorbonne, que le sieur Cardinal de Gondy, comme Prouiseur n'a aucune jurisdiction, & qu'il ne peut y auoir reglement de Iuge entre luy & le Preuost de Paris, obtiennent lettres de Compulsoire en la grande Chancellerie, du 10. Decembre 1613. à l'exécution desquelles les demandeurs s'opposent, au lieu qu'eux mesmes debuient produire lesdits tiltres, pour justifier la pretenduë jurisdiction dudit Prouiseur, font faire de gayeté de cœur vne instance au Conseil, à raison dudit Compulsoire, en laquelle ils ne produisent qu'apres auoir esté forclos, & le jour auparauant que l'on deuoit juger ladite instance, font signifier aux deffendeurs vne ordonnance de Monsieur de Chamlay Rapporteur, par laquelle ils consentent l'exécution desdites lettres de Compulsoire.

En vertu dudit Compulsoire les deffendeurs ont fait extraire quelques tiltres qu'ils ont produits.

Premierement, les lettres de l'Vniuersité de l'an 1266. par lesquelles il se voit que ladicte Vniuersité a eu la direction & surintendence sur le Prouiseur & tous ceux du Collège de Sorbonne, dès sa premiere fondation,

dont il sensuit que si ceux de ladicte maison auoient vn autre Iuge que le Preuost de Paris, ce seroit lesdits Recteur & Vniuersité, ou bien le Prouiseur prendroit d'eux sa Iurisdiction, ce que lesdits Recteur & Vniuersité ne pretendent en aucune façon, ains que toute la Iurisdiction appartient au Preuost de Paris en premiere instance.

Secondement, ils ont produit la Bulle de Clement I V. de l'an 1270. & quelques parties de trois autres Lettres, la premiere de l'an 1264. la seconde 1279. & la troisieme de l'an 1294. plus deux Statuts dudit College, l'un de l'election & confirmation du Prouiseur, l'autre de son office, & vn acte de la confirmation dudit Prouiseur faicte par l'Vniuersité, l'an 1556. le 17. Mars, esquelles pieces il n'est parlé d'aucune Iurisdiction, ains appert seulement que le Prouiseur est appelé Procureur & Maistre dudit College, & qu'en cette qualité il a le maniement du bien dont aussi est tenu rendre compte, la conduite des affaires, peut receuoir audit College ceux qui seront capables, leur en accorder bourses, & donner lettres, rejeter les incapables, tenir la main à l'obseruation des Statuts; le tout de l'aduis & consentement de ceux de la Societé dudit College, & quelquefois de toute l'Vniuersité: ce qui ne monstre qu'une simple administration, reglement de discipline, que toute compagnie destituee de Iurisdiction peut auoir & se prescrire conforme à ses Statuts, & à son Institution: mais maintenant que tout cela est commandé par les ordonnances & reformation derniere de l'Vniuersité de Paris, & par les Arrests de la Cour de Parlement, ce n'est qu'une execution de ce qui a esté ordonné; & en cas de contrauention, comme est le fait dont il s'agit, le Preuost de Paris est seul constitué Iuge en premiere instance, & non le Prouiseur, lequel ayant donné lettres de la Societé audit Boyuin contre ledit Statut, est partie en cet affaire, & ne peut estre Iuge, quand bien il auroit Iurisdiction, de laquelle toutesfois les demandeurs n'ont peu monstre aucune piece iustificatiue, bien qu'ils en

ayent esté requis par les deffendeurs lors que l'on a fait le Compulsoire.

C'est la raison pourquoy lesdits demandeurs ayans fait appeler lesdits defendeur au Cōseil, au lieu de pour-
suiure, comme ils deuoient, ont vſé de tous empesche-
mens, oppositions, delais & chicaneries, dont ils se sont
peu aduiser, esperant estourdir cet affaire, & par les grāds
frais qu'ils procuroient aux deffendeurs moyenner que
personne desormais ne s'opposast à eux, & ne se pour-
ueut en Iustice contre la violation des Statuts dudit
College de Sorbonne, se sont contentez de represen-
ter seulement ce qui touche le fond de la cause, & qui est
hors de saison, à quoy sera satisfait pertinemment en
temps & lieu.

Quand à ce qu'ils reprochent aux deffendeurs qu'ils
ne sont que trois, ils semblent vouloir ignorer qu'un seul
peut faire ce qu'ils ont fait, selon les canons, *ne inuoluatur
aliorum peccato & poena*, & ne prennent garde qu'il ne leur
est honorable d'estre plusieurs qui ont enfrainct ledit
Statut, & voulu establir vne Iurisdiction imaginaire, cō-
me si le vray moyen de perdre vne compagnee n'estoit
pas quand la pluralité maintient l'abus, respondent ne-
antmoins les deffendeurs que d'autres avec eux ont opi-
né contre la reception dudit Boyuin, qui n'ont pas vou-
lu se refoudre à la peine & aux frais d'un procès.

En second lieu, que plusieurs de ladite Societé ne se
sont encore joints aux demandeurs en cette instance, &
mesmes quelques vns dès leur ſy sont engagez crainte
de desplaire à deux ou trois, qui par brigues auoient en-
trepris faire receuoir ledit Boyuin, les autres bien qu'ils
n'auoient ladite reception, sont marris que les deffen-
deurs se soient pourueus en Iustice contre icelle, qui est
reconoistre le mal & refuser le remede.

Messieurs de CHAMLAY & MANGOT Rap.

Mr Mazuier. Rap.